

très ample dilection que nous avons pour nostre dite ville du Pont-d'Ain et ses habitans, satisfaisans à la dite ville, voulans les délivrer de pension perpétuelle, leur donnons et octroions pour nous, nos héritiers et successeurs universelz la liberté et franchise soubz escrite. Premièrement, Nous tenons par ces présentes bourgeois et habitans de la prédite ville pour libres et francs, en la prédite ville, à perpétuité, affin que de leurs droits et biens ilz jouissent, en tant qu'à nous appartient, suivant la manière et teneur soubz escrite. *Item*, sont tenus recevoir pour bourgeois qui que ce soit, qui pourra tousjours procurer la bonne renommée de la prédite ville contre toutes personnes privées et publiques. *Item*, celui qui aura esté receu pour bourgeois soit tenu avoir dans un an une maison propre, compétante, en la dite ville. Quiconque sera receu pour bourgeois sera tenu de jurer la franchise en icelle nostre prédite ville du Pont-d'Ain, et conserver précisément la franchise et la liberté de la ville prédite, pourveu que le dommage de nostre ville soit arrivé à sa cognoissance, doit le détourner de son possible, et le dénoncer par luy ou par autre au chastelain de la dite ville. Or, si quelque libre ou autres, quelz qu'ilz soient, pervertissoit par force la liberté et franchise de la dite ville du Pont-d'Ain et de ses habitans, le bourgeois aiant souffert le tort sur ce de fère (faire) au chastelain sa question, et le chastelain soit tenu d'acquérir la franchise aux bourgeois et fait distribuer dans quinze jours les amendes des delects et de sang adjudgées, païées de volonté; dez lors le chastelain et bourgeois de la ville soient tenus aider aux propres dépens de la ville et du chastelain pour recouvrer son droit. *Item*, soient tenus les habitans de la susdite ville aider à prendre le malfaiteur, jusques à ce qu'il ait esté satisfait au seigneur comte, qui pour lors sera de la chose adjudgée, jusques à ce aussy que dans an et jour il ait païé l'amende de ses délits et de sang, sans requeste de dommage au seigneur, comme sus est dit, et dez lors les bourgeois aident à recouvrer la liberté à leurs dépens, comme il semblera devoir estre fait, soit que le malfaiteur soit habitant ou non en la dite ville du Pont-d'Ain. *Item*, et moiennant ce, les bourgeois et habitans de la prédite ville, quelz qu'ils soient et pourroient estre de la dite ville, soient tenus de recognoître leurs biens, quoy que acquis à certaine condition, encore que ce soit de nostre mandement, et de chacun autre tellement, qu'il soit tenu pour bourgeois en retenant les droits, usages et charges, sauf toutesfois nostre droit et d'autre personne quelconque. Si quelque bourgeois ou habitant